

ACORDO DE COLABORACIÓN ENTRE O SERVIZO GALEGO DE SAÚDE E A FUNDACIÓN BIOMÉDICA GALICIA SUR (FBGS) PARA A XESTIÓN DA FORMALIZACIÓN DO CONTRATO DUN FACULTATIVO INVESTIGADOR, CONCEDIDO AO INSTITUTO DE INVESTIGACIÓN SANITARIA GALICIA SUR (IISGS), A TRAVÉS DA FBGS AO ABEIRO DA CONVOCATORIA 2021-2024 DE AXUDAS DA FUNDACIÓN ESPAÑOLA DE REUMATOLOGÍA (FER) PARA A INCORPORACIÓN DE FACULTATIVOS CON EXPERIENCIA INVESTIGADORA DENTRO DUN SERVIZO DE REUMATOLOXÍA.

Santiago de Compostela, a 13 de xuño de 2022

REUNIDOS

Dunha parte, **D. Julio García Comesaña**, conselleiro de Sanidade, nomeado por Decreto 112/2020, de 6 de setembro, en representación da Consellería de Sanidade, do Servizo Galego de Saúde e da Axencia Galega para a Xestión do Coñecemento en Saúde (en adiante, ACIS), actuando no exercicio das competencias que ten atribuídas polo artigo 34 da Lei 1/1983, do 22 de febreiro, de normas reguladoras da Xunta e da súa Presidencia, modificada polas Leis 11/1988, do 20 de outubro; 7/2002, do 27 de decembro; 2/2007, do 28 de marzo e 12/2007, do 27 de xullo e nos Decretos 136/2019 e 137/2019, polo que se establece a estrutura orgánica da Consellería de Sanidade e do Servizo Galego de Saúde, respectivamente; e o Decreto 112/2015, do 31 de xullo, polo que se crea a Axencia Galega para a Xestión do Coñecemento en Saúde e se aproban os seus estatutos; así como no establecido na Lei 1/2016, de 18 de xaneiro, de transparencia e bo goberno.

E doutra, **D. Francisco Javier Puente Prieto**, en calidade de presidente do Padroado da Fundación Biomédica Galicia Sur (en adiante, FBGS), en virtude do seu cargo como titular da Área de Xestión Integrada (AS) de Vigo, segundo se establece no artigo 16.2.a) dos seus estatutos, e en virtude da aceptación expresa da presidencia, en data 29 de Setembro de 2020, do Padroado da Fundación Biomédica Galicia Sur, fundación inscrita co número 2002/17 no Rexistro de Fundacións de Interese Galego, sección da Consellería de Sanidade.

MANIFESTAN

- Que a FBGS é unha fundación de interese galego en conformidade coa Lei 12/2006, do 1 de decembro, de fundacións de interese galego con personalidade xurídica propia e sen ánimo de lucro, modificada pola Lei 16/2010, do 17 de decembro, de organización e funcionamento da Administración xeral e do sector público autonómico; e réxese ademais polo Decreto 14/2009, do 21 de xaneiro, polo que se aproba o Regulamento de fundacións de interese galego e polo Decreto 15/2009, de 21 de xaneiro polo que se aproba o regulamento do Rexistro de fundacións de interese galego; e que ten por obxecto impulsar a investigación, a docencia, o desenvolvemento científico tecnolóxico e a innovación no ámbito sanitario e en Ciencias da Saúde, así como a realización de outras actividades que poidan contribuír á consecución do obxecto fundacional, caracterizado polo interese xeral galego. Con ese propósito, a FBGS serve de apoio, asesoramento e xestión aos profesionais e investigadores, nos centros do

Sistema Público de Saúde de Galicia e contribúe eficazmente á consecución dos obxectivos fundacionais, recabando o apoio das entidades públicas e privadas para os seus fins, realizando labores de difusión e divulgación da actividade investigadora dos centros de investigación de Galicia, aumentando progresivamente de este modo a súa capacidade para competir e a calidade da súa produción científica.

- Que o IISGS é un Instituto de Investigación Sanitaria que se conforma actualmente mediante a asociación das Areas Sanitarias (AS) de Vigo, Pontevedra-O Salnes e Ourense-Verin-O Barco de Valdeorras, que engloba os centros de atención hospitalaria, atención especializada e atención primaria das áreas sanitarias de Vigo, Pontevedra-O Salnes e Ourense-Verin-O Barco de Valdeorras, xunto coa Universidade de Vigo (UVigo) e a Fundación Biomédica Galicia Sur (FBGS) como órgano xestor.

O IISGS ten entre as súas principais funcións:

1. Fomentar a colaboración entre investigadores do ámbito básico, clínico, de saúde pública e en servizos de saúde.
2. Promover a investigación traslacional e a innovación que teñan aplicacións e repercusións clínicas.
3. Fomentar a colaboración entre os centros de investigación das entidades que integran o Instituto e outros pertencentes a outras institucións de investigación no ámbito autonómico, estatal e supraestatal.

O IISGS carece de personalidade xurídica propia, polo que os actos xurídicos necesarios para a consecución dos seus fins son adoitados pola FBGS, como órgano de xestión do Instituto de acordo co Real Decreto 279/2016, de 24 de xuño, sobre acreditación de Institutos de investigación biomédica ou sanitaria.

- Que a Fundación Española de Reumatología (FER, en diante) publicou o 17 de maio do 2021 unha convocatoria de 3 axudas para Facultativos Investigadores coa finalidade de promover a incorporación a tempo completo de persoal facultativo con experiencia investigadora dentro dun Servizo de Reumatoloxía para as anualidades 2021-2024.
- Que **D^a. Irene Altabás González** solicita, a través da FBGS e ao abeiro de dita convocatoria, unha axuda destinada á incorporación aos centros asistenciais do SNS de persoal facultativo con experiencia investigadora e cuxo obxecto é a contratación de profesionais, en entidades sanitarias públicas e privadas sen ánimo de lucro, vinculadas ou concertadas co SNS, con actividade asistencial, que teñan superado a Formación Sanitaria Especializada (FSE), para o desenvolvemento dun plan de formación en investigación en ciencias e tecnoloxías da saúde que simultanearán coa actividade asistencial correspondente a súa especialidade.

- Que en data 8 de novembro de 2021 comunícase por parte da Comisión de Publicacións e Becas da Fundación Española de Reumatología, a concesión dunha axuda a D^a Irene Altabás González para a súa incorporación no Complexo Hospitalario Universitario de Vigo.
- Que, en virtude da citada convocatoria, establécese que *"La vinculación contractual que se genere será como médicos asistenciales del Sistema Público de Salud correspondiente, modelo **Contrato Juan Rodés**, utilizado por el Instituto de Salud Carlos III en forma de actuaciones para la incorporación a los centros asistenciales del SNS de personal facultativo con experiencia investigadora. La Concesión de estas ayudas no creará relación laboral alguna entre la FER o la Fundación de Investigación del Centro y los beneficiarios de las mismas, sino que estará sujeta a la legislación laboral aplicable a los centros del SNS donde se ejecute el contrato"*,
- Que en virtude da citada convocatoria *"Se entiende como centro receptor a aquellos Servicios de Reumatología que dispongan de un grupo de investigación, liderado por un reumatólogo como jefe o coordinador del mismo, bien con acreditación formal como "Grupo Consolidado" en el ámbito de un Instituto de Investigación Sanitaria (IIS) acreditado por parte del Instituto de Salud Carlos III (ISCIII) o con una trayectoria investigadora como grupo de investigación conformado por al menos un Investigador Responsable y dos integrantes del grupo, con una trayectoria común de desarrollo de actividades y publicaciones conjuntas, que deben cumplir, en los últimos 5 años."* é o Servizo Galego de Saúde (Complexo Hospitalario Universitario de Vigo) o que poderá contratar a candidata seleccionada.

Que, á vista de canto antecede, as Partes conveñen en outorgar o presente acordo con suxección ás seguintes

CLÁUSULAS

PRIMEIRA.- Obxecto

Constitúe o obxecto do presente convenio a colaboración entre as partes para a **incorporación dun Facultativo Investigador no Servizo de Reumatoloxía** do Complexo Hospitalario Universitario de Vigo, no modelo de contratación que proceda de acordo co recollido ao abeiro da convocatoria de concesión de axudas de Facultativos Investigadores da Fundación Española de Reumatología 2021-2024, concedida ao IIGS a través da Fundación Biomédica Galicia Sur.

SEGUNDA.- Compromisos das partes

- Pola parte do IISGS, a través da FBGS:

-Realizar a achega económica ao Servizo Galego de Saúde (Complexo Hospitalario Universitario de Vigo) do importe concedido, isto é, **45.000,00 euros anuais durante un prazo máximo de tres anos.**

A financiación en cada anualidade estará suxeita a existencia de dispoñibilidade orzamentaria do órgano concedente nos exercicios económicos correspondentes, e condicionada á presentación en tempo e forma da xustificación económica anual.

-Envío de copia dos contratos asinados polas partes, facilitados polo Servizo Galego de Saúde (Complexo Hospitalario Universitario de Vigo) á FBGS e á Axencia de Coñecemento en Saúde (ACIS) no prazo dun mes dende a súa sinatura.

-Colaborar co Servizo Galego de Saúde (Complexo Hospitalario Universitario de Vigo) no seguimento e control da contratación, debendo dar cumprimento ás obrigas recollidas na Convocatoria e tal como se indica na comunicación de concesión da axuda antecitada.

- Pola parte do SERVIZO GALEGO DE SAÚDE (COMPLEXO HOSPITALARIO UNIVERSITARIO DE VIGO):

-Realizar, cos fondos achegados pola FER, a través da FBGS, a xestión do contrato co candidato/a seleccionado/a, que deberá estar asinado dentro dos seguintes 180 días a contar dende a data de transferencia dos fondos. **Os fondos distribuiranse preferentemente en 14 pagas.**

- Remitir copia dos contratos á FBGS no prazo máximo de 15 días naturais tras a súa sinatura - Facer referencia expresa no contrato ao N° de Expediente, retribución, tipo de xornada, horas e demais circunstancias, dando cumprimento ás condicións indicadas na convocatoria e a súa resolución.

-Comunicar calquera incidencia que se orixine nos contratos tan pronto como se produza a mesma (Interrupción dos contratos por maternidade, adopción, incapacidade temporal, etc...)

-Non formalizar, asociados a estes contratos, servizos de garda que superen as 96 horas ao mes (24 horas ou fraccións).

-Asumir as cotas empresariais á Seguridade Social e resto de gastos da contratación, non cubertos pola subvención.

TERCEIRA.-Condicións de pago

As achegas económicas que se efectúen por parte da FER, a través da FBGS, e que proveñen da convocatoria correspondente ós anos 2021-2024 de concesión de axudas para Facultativos Investigadores, destinaranse a sufragar os gastos derivados da contratación do candidato que estableza a comunicación definitiva do órgano concedente.

En concreto, o IISGS, a través da FBGS, achegará **45.00,00 euros anuais ó número de conta que ten aberto o Servizo Galego de Saúde [ESxx 00xx-5x6x-2x-000xxxxxxx], durante un prazo máximo de tres anos, en concepto de retribución bruta salarial.** As cotas empresariais á Seguridade Social e resto de gastos de contratación correrán a cargo do Servizo Galego de Saúde (Complexo Hospitalario Universitario de Vigo).

En caso de que, por calquera causa, o convenio se resolvese antes do prazo previsto, devolveráanse ao IISGS, a través da FBGS, as cantidades percibidas e non executadas ó momento da resolución, xunto coa documentación reflectida na cláusula segunda.

CUARTA.- Duración

O presente acordo terá efectos dende a data da súa sinatura, e a súa vixencia estenderase por un prazo máximo de 3 anos correspondentes á execución da actividade, a partir da data de incorporación da adxudicataria ao centro. En todo caso, o contrato permanecerá vixente ata que se cumpran as obrigas previstas no mesmo.

QUINTA.- Réxime Xurídico

O nomeamento como persoal facultativo investigador terá como obxecto a prestación de servizos na área de Reumatoloxía do Complexo Hospitalario Universitario de Vigo e non poderá estenderse máis aló dos 3 anos. Asemade, unha vez vencido o seu prazo de duración, non poderá producirse a consolidación da investigadora beneficiaria da referida axuda convocada pola FER como persoal do Servizo Galego de Saúde baixo ningún tipo de modalidade contractual ou nomeamento de carácter administrativo (de conformidade coa Orde do 7 de xuño de 2021 pola que se regulan os nomeamentos de persoal estatutario do Sistema Público de Saúde de Galicia).

SEXTA.- Comisión de seguimento

O seguimento das accións que o Convenio contempla, levaranse a cabo a través dunha Comisión de Seguimento que estará constituída por dous representantes designados polo Servizo Galego de Saúde e pola FBGS, ó obxecto de avaliar o desenvolvemento das actividades derivadas do Convenio e o seu grao de cumprimento.

Por parte da FUNDACIÓN BIOMÉDICA GALICIA SUR:

A Directora da Fundación Biomédica Galicia Sur (FBGS)

Por parte do SERVIZO GALEGO DE SAÚDE:

A Directora da área de Planificación e Promoción da Investigación Sanitaria da ACIS

Asemade, serán funcións da citada Comisión de Seguimento, interpretar e resolver cantas dúbidas e discrepancias puideran xurdir no cumprimento deste Convenio, así como todas aquelas cuestións que se plantexen na execución do mesmo, fixando os criterios de seguimento e avaliación dos resultados.

SÉTIMA.- Xustificación

O Servizo Galego de Saúde responderá directamente fronte á FBGS do cumprimento da obriga de destinar, no prazo previsto, as cantidades detalladas na cláusula terceira, para a realización das actuacións previstas no presente acordo.

Se, como consecuencia do incumprimento das obrigas do Servizo Galego de Saúde, a FBGS se vira obrigada a devolver ó órgano concedente unha parte ou a totalidade da cantidade achegada, aquela comprométese a restituir dito importe á Fundación, cos intereses de demora que, no seu caso, puideran proceder en dereito.

OITAVA.- Publicidade

Deberase dar a axeitada publicidade do carácter público da actividade subvencionada, indicando, se fose o caso, a cofinanciación con fondos europeos ou doutras Administracións públicas, de acordo co establecido nos regulamentos da Unión Europea.

En concreto, nos contratos laborais que se formalicen ao abeiro do presente acordo, deberase incluír a seguinte información:

- Logo SERGAS (Área Sanitaria de Vigo)
- Logo IIBGS
- **Nº expdte: concedido a D^a. Irene Altabás González**, por parte da Comisión de Publicacións e Becas da Fundación Española de Reumatología

NOVENA.- Cuestións litixiosas e xurisdición

O presente acordo someterase e interpretarase conforme á lexislación española. Para a solución das diverxencias que puideran xurdir na interpretación, execución ou validez do mesmo, as partes someteranse á xurisdición e competencia dos Xulgados e Tribunais, con renuncia expresa a calquera outro foro que puidera corresponderlles.

A sinatura deste Convenio de Colaboración leva implícito o consentimento expreso das persoas intervinientes para que a Administración pública autonómica galega poda facer públicos os datos de carácter persoal que figuren nel, de acordo co disposto na Lei 19/2013, de 9 de decembro, de transparencia, acceso á información pública e bo goberno, e a Lei galega 1/2016, do 18 de xaneiro, de transparencia e bo goberno.

O presente Convenio será obxecto de inscrición no Rexistro de Convenios da Xunta de Galicia, nos termos previstos no Decreto 126/2006, do 20 de xullo, polo que se regula o Rexistro de Convenios da Xunta de Galicia.

E, en proba de conformidade co íntegro contido do presente Convenio, as partes o asinan, en Santiago de Compostela, na data da sinatura dixital.

A FUNDACIÓN BIOMÉDICA
GALICIA SUR (FBGS)

O SERVIZO GALEGO DE SAÚDE

Asdo. D. Francisco Javier Puente Prieto

Asdo. D. Julio García Comesaña